

ՄԵՂՐԻ ՀԱՄԱՅՆՔԻ ՂԵԿԱՎԱՐ ԽԱՉԱՏՈՒՐ ԱՆԴՐԵԱՍՅԱՆԻ ՇՆՈՐՀԱՎՈՐԱԿԱՆ
ՈՒՂԵՐՁԸ ԼԻՃՔ ԲՆԱԿԱՎԱՅՐԻ ՕՐՎԱ ԱՌԹԻՎ

Սիրելի՛ լիճքեցիներ,

Օգոստոսի 15-ը մեր համայնքի համար այսուհետև կունենա յուրահատուկ խորհուրդ-
ըստ Մեղրի համայնքի ավագանու թիվ 102-Լ որոշման՝ առաջին անգամ նշվում է Մեղրի
համայնքի Լիճք բնակավայրի օրը: Հիշարժան պահ է՝ լեռներին թիկնած բարձրադիր
բնակավայրի մերօրյա կյանքում նոր ու գեղեցիկ ավանդույթի մեկնարկ:

Առատորեն օրհնված Լիճքը տեղակայված է Սյունյաց բարձր լեռնաշխարհում՝ ծովի
մակերևույթից շուրջ 1780 մ բարձրության վրա: Դարավոր հարևանն է հնամենի
Տաշտունի, աչքի է ընկնում իր չնաշխարհիկ բնաշխարհով, սառը և ջրառատ
աղբյուրներով, լեռնային արագահոս գետակներով ու առվակներով:

Հարուստ է պատմամշակութային հուշարձաններով, որոնք նրա բազմամյա
պատմության լուռ վկաներից են: Դրանցից են 17-րդ դարի քարաշեն կամուրջը, գյուղի
կենտրոնի հին գերեզմանատեղին, 1941-1945 թվականների Հայրենական մեծ
պատերազմում հերոսացած լիճքեցիների հուշարձանը, որը երախտապարտ
համագյուղացները կառուցել են հեռավոր 1967 թվականին:

Լիճքից ներքև է երբեմնի Զվարի բնակավայրը, որտեղով հոսում է Մեղրի գետի
ամենամեծ Զվարի վտակը: Այստեղ է գտնվում 10-րդ դարի Զվարավանքը, որը
վերակառուցվել է 17-րդ դարում: Լիճքի կենտրոնում է գտնվում Սուրբ Կարապետ
(հիշատակվում է նաև Սուրբ Գևորգ) 1658 թվականին կառուցված եկեղեցին:

Լիճքը Մեղրի համայնքի այն բնակավայրերից է, որը տարիներ շարունակ աչքի է ընկել
իր աշխատասեր, միական և հայրենասեր բնակչությամբ: Նրանց ջանքերով և
նվիրումով պահպանվել է ոչ միայն գյուղի դիմագիծը, այլև նրա հոգևոր և մշակութային
շունչը:

Շնորհակալությունս եմ հայտնում Լիճք բնակավայրի վարչական ղեկավար Հայկ
Հովհաննիսյանին՝ նվիրվածության և բնակավայրի զարգացման գործում ունեցած
ավանդի համար, այն երախտավոր բնակիչներին, ովքեր իրենց ներդրումն են ունեցել
Լիճքի զարգացման ընթացքում և շարունակում են ապրեցնել, շենացնել հայրենի գյուղը:

Սիրելի բարեկամներ,

Մաղթում եմ, որ ձեր ընտանիքներում տիրի խաղաղություն, առողջություն,
բարեկեցություն ու սեր:

Թող Լիճքի օրվա այս անդրանիկ տոնակատարությունը դառնա մնայուն ավանդույթ և
ամրապնդի մեր համախմբվածությունն ու փոխվստահությունը:

Շնորհավոր տոնդ, սիրելի՛ Լիճք: